

**Qalerallit avataasiorluni aalisarnermi pisarineqartut akitsuutaat pillugu Inatsisartut
inatsisaata allangortinneqarneranik Inatsisartut inatsisissaattut siunnersuut**
Aningaasaqarnermut Nunamullu Namminermut Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerseqarnissaanut saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq
Inatsisartunut ilaasortaq Gerhardt Petersen, Atassut, siulittaasup tullia
Inatsisartunut ilaasortaq Evelyn Frederiksen, Siumut
Inatsisartunut ilaasortaq Jens Imanuelsen, Siumut
Inatsisartunut ilaasortaq Kalistat Lund, Inuit Ataqtigiit
Inatsisartunut ilaasortaq Hans Aronsen, Inuit Ataqtigiit
Inatsisartunut ilaasortaq Naaja Nathanielsen, Inuit Ataqtigiit

Ulloq 25. september 2013-imi siullermeerinerup kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Qaleralinnut akitsuummik akiliisussaataaneq pisap nunatsinnit anninnerani inummulluunniit pingajuusumut tunineqarnerani ullumikkut atuutilersarpoq. Tamatuma kinguneraa aalisarneqartunit ikinnerusut akitsuuteqaataasarnerat, tassa aalisakkat tunineqannginnerminni suliareqqaarneqarajummata. Tamatuma saniatigut qalerallit nunatsinnit tunineqartut suliffeqarfissuup iluani amerlasuutigut nuunneqartarput, taamaattumillu niuerfimmi akigitinneqartut aallaaviginagit suliffeqarfissuulli iluani akigitinneqartut naleqqersuummik naatsorsuinerumut tunngaviusarnerat aarleqqutigineqarsinnaalluni. Akitsuummik akiliisussaataanerup pisap pisarineqarnerani atuutilersussanngorlugu siuartinneqarneratigut kiisalu akitsuummik iluarsisuteqarnermi qalerallit akii qanoq ittut ilaatinneqarnissaasa allangortinneqarneratigut akitsuusiinermi tunngavissaq patajaallisinneqassaaq.

Siunnersuutip Inatsisartunit siullermeerneqarnera

Siullermeerinermi siunnersuut tapersorsorluarneqarpoq.

Tusarniaanermi akissutit

Tusarniaanermi akissutit inatsisissatut siunnersuummut ilanngullugit Inatsisartunut nassiu-neqarsimapput, tamannalu Inatsisartut Siulittaasoqarfiata ilusiliinissamut piumasaqaataanut naapertuuppoq. Siunnersuut 2013-imi 24. junimit 25. julimut tusarniutigineqarsimasoq ataatsimiititaliamit maluginiarneqarpoq. Julip qaammataa piffinnit amerlanernit sulinngiffeqarfittut isigineqartarpoq. Inatsisinut tunngatillugu Namminersorlutik Oqartussat najoqqutassi-aanni allassimavoq tusarniaanerit sulinngiffeqarnerup nalaani ingerlanneqartut sivisuneru-sunik piffissaqartitsiffiusariaqartut. Najoqqutassiat malinneqarsimannginnerat ataatsimiitita-liamit ajuusaarnartutut isigineqarpoq.

Ataatsimiititaliap siunnersuummik suliarinninnera

Siunnersuut tusarniaanermi akissutini taperserineqarpoq ataatsimiititaliamit maluginiarne-qarpoq. Siullermeerinermi Naalakkersuisut oqaaseqaataat aammalu siunnersuummut nassui-aatini allassimasut ataatsimiititaliamit tusaatissatut tiguneqarput.

Siunnersuutip aningaasaqarnikkut kingunerisassai

Siunnersuutip piviusunngortinneqarnerani aningaasaqarnikkut kingunerisassat siunnersuum-mut nalinginnaasunik nassuiaatini nassuiaatigineqarput. Naalakkersuisut allapput siunnersuut isertitassatigut 5 %-it missinginik amerlissutaanissaa naatsorsuutigineqarpoq, taakkulu tassaal-lutik aalisakkat pisarineqarnerminni oqimaassusiisa aammalu tunisassiarineqareerlutik nuna-mit anninneqartut oqimaassusiisa nikingassutaat. Inatsisip allannguutai allaffissornikkut taasa-rialinnik sunniuteqartussatut naatsorsuutigineqanngillat. Taamaattorli nakkutilliinerup pitsan-ngortinneqarnissaa naatsorsuutigineqartariaqassaaq, tassa akitsuusiineq aammalu aalisarsin-naanermi akuersissutinik nakkutilliisoqarfimmut nalunaaruteqarneq ataatsikkut ingerlanne-qartalertussatut naatsorsuutigineqarmata.

Ataatsimiititaliap inassuteqaatai

Ataatsimiititaliami amerlanerussuteqartut Siumut Atassullu siunnersuut pillugu ima oqaaseqaateqarumapput:

Siunnersuutip aappassaaneerineqarnissaanut paasisutissat annertunerusut pisariaqartinneqar-tutut amerlanerussuteqartunit isigineqanngillat.

Tamanna tunngavigalugu siunnersuut Inatsisartunit akuersissutigineqassasoq **ataatsimiitita-liami amerlanerussuteqartut siuliani allassimasut inassutigaat.**

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqaateqarumapput:

Siunnersuut piffissap imaalinerani Inuit Ataqtigiinnit akuerineqarsinnaananilu itigartinneqarsinnaanngilaq. Siunnersuut pillugu paasissutissanik erseqqinnerusunik pissarsiniarnissamik ikinnerussuteqartunit kissaatigineqartup ataatsimiititaliami amerlanerussuteqartunit itigartinneqarnera Inuit Ataqtigiinnit ajuusaarutigineqarpoq. Naatsorsuinermi tunngavik aammalu akitsuutip qaffasissusissaanik aalajangiinermut atatillugu isumaliutit pillugit annertunerusumik paasissutissinneqarnissaq Inuit Ataqtigiit kissaatigaat Naalakkersuisunullu kaammattuutigalugu pingajussaaneerinissaq sioqqullugu paasissutissat taakku Aningaasaqarnermut Ataatsimiititaliamut nassiunneqarnissaat namminneerlutik sulissutigeqqullugu. Inatsisartuni ataatsimiititaliat tamarmiusut ilisimasanik aallaaveqartumik sulinissamut aammalu ilaasortat ilisimasanik pissarsinissamut pisariaqartitsinerannik malinninnissamut pisussaasut Inuit Ataqtigiit isumaqarput.

Tamanna tunngavigalugu ataatsimiititaliami ikinnerussuteqartut siuliani taaneqartut piffissap imaalinerani siunnersuut Inatsisartunit itigartinneqartussatut akuerineqartussatuluunniit inassutigisinnaanngilaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Finn Karlsen, siulittaasoq

Gerhardt Petersen

Evelyn Frederiksen

Jens Immanuelson

Naaja Nathanielsen

Hans Aronsen

Kalistat Lund